

03/02/2000

Seri Paduka pulang dari Brunei

KUALA LUMPUR, Rabu - Yang di-Pertuan Agong Sultan Salahuddin Abdul Aziz Shah dan Raja Permaisuri Agong Tuanku Siti Aishah pulang ke tanah air petang ini selepas menamatkan lawatan negara selama tiga hari ke Brunei.

Ketibaan baginda berdua di Lapangan Terbang Sultan Abdul Aziz Shah (LTAAS) disambut oleh Menteri Pengangkutan Datuk Seri Dr Ling Liong Sik, Menteri di Jabatan Perdana Menteri Datuk Dr Abdul Hamid Othman, timbalan-timbalan menteri dan pegawai tinggi kerajaan.

Terdahulu, di BANDAR SERI BEGAWAN, Putera Mahkota Al-Muhtadee Billah dan Puteri Masna berada di Lapangan Terbang Antarabangsa untuk mengucapkan selamat jalan kepada Seri Paduka berdua.

Sebelum itu, Sultan Salahuddin dan Tuanku Siti Aishah mengunjungi Sultan Hassanal Bolkiah di Istana Nurul Iman untuk mengucap selamat tinggal. Raja Isteri Pengiran Anak Hajah Saleha dan Pengiran Isteri Hajah Mariam turut hadir.

Pagi ini, pelawat diraja itu meluangkan masa satu jam belayar menyusuri Sungai Brunei dan diberi taklimat mengenai Kampung Ayer, satu daripada mercu tanda Brunei Darussalam.

Antara acara baginda berdua di sini ialah menghadiri jamuan teh bersama 300 rakyat Malaysia selain melawat Bangunan Alat-alat Kebesaran Diraja.

Malam tadi, Sultan Salahuddin menganjurkan santapan balas untuk Sultan Hassanal Bolkiah di Dewan Assarra. Lawatan itu mendapat liputan meluas media Brunei.

Ramai rakyat Brunei beratur di sepanjang jalan yang dilalui Seri Paduka untuk menatap wajah pelawat diraja itu.

Menteri Penerangan Tan Sri Khalil Yaakob selaku menteri pengiring, berkata lawatan Seri Paduka berjaya mengukuhkan hubungan dua hala kedua-dua negara.

Beliau berkata, menteri Brunei yang ditemui menyuarakan minat untuk mengadakan hubungan lebih erat dengan Malaysia, terutama dalam bidang perubatan dan pendidikan tinggi.

"Kebanyakan mereka minat dengan pembangunan di Kuala Lumpur dan memandang tinggi terhadap Perdana Menteri Datuk Seri Dr Mahathir Mohamad," katanya ketika ditemui pada majlis ramah mesra bersama masyarakat Malaysia di sini.

Khalil juga berkata, walaupun ini adalah lawatan negara pertama Seri Paduka berdua ke Brunei sejak ditabal sebagai Yang di-Pertuan Agong dan Raja Permaisuri Agong pada 26 April lalu, layanan yang diterima daripada kerajaan Brunei jelas memperlihatkan kemesraan yang telah lama terjalin.

(END)